

Cun nov schlantsch en la stagiun d'enviern?

■ (rtr) L'euro è puspè or dal tschaler, i ha dà naiv enfin giu en las valladas ed ils economs prognostitgeschan in creschament da l'economia. Las premissas èn pia bunas per avair ina buna stagiun d'enviern, dentant, tanschan bunas premissas? Discussiun cun ils exponents. «Na, il problem n'è betg schlià be cun ina buna entschatta da l'enviern, la midada dal clima resta», di Anita Mazzetta, manadra dal WWF Grischun. Quai fetschia bain plaschair da vesair ils culms alvs, dentant per il turissem saja da patrar a lunga vista – betg bajegiar dapertut novas pendicularas ubain indrizs da far naiv, mabain renovar quai ch'è gia enturn ed empruvar da

trair a niz quai l'entir onn. Er Martin Hug da las Pendicularas Grischun sustegna per part quella opiniun e di: «La gronda fermezza dal Grischun è la natira e nus guardain da nos pizs bler meglier che per exempel en l'Austria». Tuttina: I dovria dapli cooperaziun per gidar il turissem er en il futur. «Ina schliaziun fiss per exempel da nizzegiar las pendicularas tut l'onn e da vender differents purschidas, betg be a la gruppa da quels che van cun skis, mabain er per exempel viandar, ir cun bike ubain simplamain ir en la natira», è Martin Vincenz, CEO da Grischun Vacanze, persvadi. Dentant, per pudair vender insatge dovria quai er la purschida.

Avertura dil «Gütsch-Express»

■ (anr/sr) Sonda, ils 23 da december 2017 sa la Skiarena Andermatt-Sedrun inaugurar la nova telecabina dad otg plazz «Gütsch-Express». L'avertura da quella telecabina dad Andermatt-Nätschen-Gütsch e la sutgera Hinter Bördli-Strahlgand ed il Lutersee-Flyer ei in ulteriuor mument decisiv el project dalla colligiaziun dils territoris Andermatt e

Sedrun. La fiasta d'inauguraziun entscheiva allas 12.00 alla staziun amiez dil Nätschen. El restaurant da famiglia dat ei punsch e Hot Dogs gratuits pils affons e ligiongias pils carschi. Il team dalla tecnica dat investa ella garascha/luvatori e stat a disposiziun per damondas. Ella nova MATTI KidsArena dat ei in program da divertiment ed attracziun pils affons.



La colligiaziun dils territoris da skis Andermatt e Sedrun s'avonza. Sonda vegnan la nova telecabina «Gütsch-Express» e duas sutgeras aviartas.



Affons dil 4. quartal dall'annada 2016

Suenter las presentaziuns dils affons dil terz quartal dall'annada 2016 vul La Quotidiana cuntinuar cun presentar ils affons dil quart quartal 2016. Nus dein la pussevliadad agl entir intschess romontsch da separticipar.

Tarmettei pia ina foto actuala da vies affon ch'ei naschius denter l'entschatta october ed ils 31 da december 2016 cun las suandontas indicaziuns.

- num e prenum digl affon
- data da naschienscha
- liug da domicil
- num e prenum dils geniturs


La foto digitala duei esser sil pli pauc 500 KB. Fotografias da handy ein buc adattadas, bunas fotos sin pupi perencunter bein. Secapescha che lezzas vegnan returnadas.

Las fotografias e las indicaziuns ein d'inoltrar entochen l'entschatta schaner 2018 alla suandonta adresa:

La Quotidiana
L'annada 2016
Via Sommerau 32
7007 Cuera

e-mail: redacziun@laquotidiana.ch

Ord il ravugl dallas annunziats inoltradas trai la dila da cletg treis victurs. La Quotidiana selegra dils purtrets dils affons romontschs ed engrazia per la collaboraziun.



L'Uniu chanzun rumantscha tscheca novas cumposiziuns ed ha lantschau la concorrenza da cumposiziun. FOTO A. CADONAU

Encuretgn novas melodias

L'Uniu chanzun rumantscha ha publicau las premissas dalla concorrenza da cumposiziun

■ (anr/ac) La concorrenza da cumposiziun iniziada dalla Uniu chanzun rumantscha ei lantschada. Entochen il zercladur proxim han cumponistas e cumponists temps dad inoltrar ovras per chor d'affons, mischedau ni viril. Divers texts ha l'uniun mess a disposiziun. Metter a disposiziun als chors novas canzuns romontschas ei ina dallas finamiras dalla Uniu chanzun rumantscha presidiada da Clau Scherrer. E gia da bial'entschatta ei la concorrenza da cumposiziun stada prevedida per in dils mieds da promover il cant romontsch. Dacuort ha l'uniun mess ella reit sia preschientscha digitala cun las cundiziuns da participaziun e cun ina retscha da texts che pon vegnir duvrai tenor basegns da cumponistas e cumponists. La concorrenza ei buca restrenschiada davart dalla naziunalitad dalla participaziun. L'Uniu chanzun rumantscha sereferescha alla tradiziun dalla ovra cantica romontscha ch'ei per part vegnida scaffada da cumponists da lieunga tudestga che han mess en musica texts romontschs. A disposiziun stattan diversas remas romontschas dad enconuschents auturs ed auturas en tut ils idioms inlus rumantsch grischun. Secapescha ch'els participonts alla concorrenza han liber maun dad eleger tgei texts ch'els vulan, era tals ch'ei buca presents ella gliesta publicada dalla uniun. La concorrenza ei aviarta per treis categorias. Chor d'affons en ina entochen treis vuschs cun la pussevliadad dad in accumpignament da clavazin e per las

categorias chor mischedau e viril a capella en treis ni quater vuschs.

Dils misteris da cumponer

Cumposiziun, enzatgei ch'ins sa semplamein scurlar ord la mongia? Tuttavia buc, sco quei che Gion Balzer Casanova ha tradiu. El vala per in dils pli productivs cumponists romontschs contemporans. Biebin 120 ovras ha il cumponist da Laax actualmeins annunziat alla organizaziun che segirescha ils dretgs dils cumponists. Casanova ha getg dad adina haver renviau incumbensas per cumposiziuns ligiadadas ad in termin. Sias melodias creschian, ellas stoppien vegnir ord il venter, il cor e seigien suttemessas ad ina certa inspiraziun, al mument che la melodia neschi en sia imaginaziun. En quei mument sesprovi el lu da metter quella melodia sil pupi. Casanova attribuescha il fatg da buca puder furnir sin termin a sia munconza dad ina scolaziun cumpositorica. «Jeu sun in autodidact.» El ha getg dad esser sededicaus alla musica per plascher dil cant enteifer sia incarica professiunala da scolast. Fertion ch'el cumponist da Laax metta sia emprema varianta dalla nova cumposiziun cun il rispli sin pupi existan oz divers mieds electroniche che levgieschan la lavur dil cumponist. Mieds che Casanova fa diever en in secund pass da sia lavur. Plascher ha il cumponist da Laax dalla giuventetgna che sededichescha cun ina outra tenuta alla musica. «Els ein buca talmeins suttemess allas restricziuns educatoricas e dil temps sco mia generaziun.» Oz stat Casanova mal da bein-

enqual cumposiziun ch'el ha fiars el canaster da pupi sco giuven scolast. Tuttina eis el aunc adina prompts da sesviluppar e da far musicalmeins novs pass.

La melodia sin via

Planisar melodias ch'anflan igl access al mund musical ed al publicum san ins buc ha Casanova accentuau. Mai havess el s'imaginau che sias melodias cun «La sera sper il lag» alla testa anflan in tal resun. Oz san ins persequitar il viadi mundial da quella melodia via youtube. La melodia da «La sera sper il lag» ei vegnida sur notg e la damaun en scola ha Casanova mess ina emprema varianta sin pupi. Plascher ha il cumponist dad udir il diever dalla atgna ovra. Personalmeins ei sia cumposiziun «Consolaziun» cun in text da Flurin Darms pli datier, sco el ha tradiu. Casanova valetescha ella per pli persunala inspirada dalla atgna biografia. Da gronda impurtanza ein ils texts per il cumponist da Laax. El attribuescha ad els la medema valur sco alla cumposiziun e conceda als texts senz'alter potenzial d'inspiraziun per il cumponist. Tonpli eis ei da sperar che biaras melodias vegnien sur notg ils proxims meins a biaras cumponistas e biars cumponists. Sin il pli tard ils 11 da zercladur 2018 ston las cumposiziuns esser ella scaffa da brevs da Christoph Cajöri, responsabels tier l'Uniu chanzun rumantscha per la concorrenza da cumposiziun.

Ulteriuras informaziuns: chanzunrumantscha.ch

Musica festiva a Glion

■ (anr/abc) Damaun sonda, il gi avon la vigelgia da Nadal porscha ina firma privata a Glion per l'emprema gada ina attracziun speciala. Finamira dalla «musica da Nadal» dueigi buc esser dad irritar e strapazzar la hectica. Gieri ed Andrea Darms, possessurs dalla Immo Darms SA, vulan per l'emprema gada porscher in mument festiv el marcau. En marcaus grondis, mo era a Cuera, eis ei daventau ina tradiziun che formaziuns musicalas introduceschan il temps festiv cun musica giud aultas tuors e balcuns. Tgi ch'ei damaun sonda allas 16.00 a Glion vegn a saver tedlar naven dalla piazza-cumin la musica da treis differents formaziuns. Alzai ora da treis differents lautgas entuorn la piazza laian els resunar melodias da Nadal. Ei vegn ad esser specialmeins festiv da tedlar quella musica sper il grond pègn decorau e glichont. Tier il mument festiv entuorn la fontauna dalla piazza-cumin porschan Gieri ed Andrea Darms als passants che seferman e teidlan punsch, vin cauld e biscuits.



La musica festiva giud treis lautgas e balcuns entuorn la piazza-cumin a Glion resuna damaun sonda naven dallas 16.00.

Musica festiva resuna damaun a Glion entuorn la piazza-cumin ed il pigniel orna.

FOTO A. BEELI